

比至物化三十五年之間其相與往來者梁運使斗南陳翰林
秀玉吳大理卿德明輩每論及當世人物至以宰輔之器許之
其雅量高致爲可知已歷觀三代宗師所行之實跡則是靡有
一事不相咨問不相假借而成之者又於化前後凡十數日數
相往來於似夢非夢之中豈亦各人胷次真理融會之地別有
相得於形聲之表歟何其誠通氣合物莫能間而至於是耶或
者往往竊議謂同出身於儒之故茲蓋囿於私智之所見也化
之後真常祭之曰與公相會三旬有五不交以勢不聚以富憶
初相見無言心許公今假化境出非人生死示跡孰知其神此
豈囿於私智者之所能及也哉予故斷之曰如其不然烏得爲

道藏輯要

甘水仙源錄

八

翼集三

寂照乃銘之曰

堂堂佐玄博大無偏止水應物不隨物遷禮服智燭仁宅義路
才德雖兼時則不遇華門圭竇終日如愚窮通有別聖道豈殊
忽遇長春星拱北辰一惠發藥德因日新孔廟躬修武廟繼朔
文武之道將行有望公之所開豈小補哉贊成玄教亦卜大來
荆金趙璧光而不耀英華外發誠明內照昔日非熊今學猶龍
彼此一時不謀攸同刊之金石磨滅有終盛德流風云胡可窮

重玄廣德弘道真人孟公碑銘

太原虛舟道人李鼎撰

公名志源字德清號重玄子其先本上京徒單氏大定末遷萊

州膠水居孟氏宅人因以孟氏歸之此亦古之因食采地得氏者也高祖貺卒於汾陽軍節度使高祖母完顏氏金源郡王希尹之妹曾祖克寧尙嘉祥縣主事熙宗海陵興陵道陵凡四朝以功累遷至太師封淄王及薨諡曰忠烈祖斜哥辭世襲千戶終于南京副留守父給答馬復世襲千戶職母烏林答氏略以金國名臣傳考之其家世可謂盛矣況在大定明昌泰和間使他人處之鮮不爲紛華之所流蕩公獨從髫鬣中猷富貴而樂淡薄非性分上夙有薰習之力能之乎明昌初年饑卽墨人高翔嘯聚劫掠詔命公之父討之乃曰食者民之天得之則生弗得則死抵死求生小人之常情討而誅之惡在其爲民父母也

道藏輯要

甘水仙源錄

九

翼集三
又文川

遂宣布主上之德賑以倉廩不戮一人寇爲之平古語有云活千人之命其後必有顯者是公能了此大事亦必借先世豐功厚澤陰相之力而致之耳公有三兄六弟其兄有官至驃騎者有至輔國者餘皆克紹家聲泰和癸亥父母與議婚事公因遁去徑詣濰州玉清宮見長春宗師請爲門弟子師憐其貴家子兼異其風骨不凡後必爲玄門大器乃從其請授今之名字父兄疑其第四都全真觀主知之故爲隱匿繫歸有司公聞之遂還家自言其志父母知不可奪因選第二都樂真觀使居之樂真今更名玉清矣公雖得法於長春充養之際亦嘗質於玉陽太古二師真玉陽賜號開真子太安己巳長春應詔京師還住

玉清知公有所得乃賜重玄子號蓋嘉之也貞祐癸酉公之昆弟皆爲兵亂蕩散而父母失依公乃扶二親就已所居致孝養之力三載雖二兄還其安置省問誠敬之禮未嘗缺己卯聖朝遣便宜劉仲祿起長春於海濱門人中選道行清實可以從行者得十八人公其一也及進程萬里沙漠其輜重車皆兩人主之惟公獨御焉清和憫其勤請副於師師曰吾知斯人之勤矣但欲先行其人之所難而後必有大所獲耳公聞之乃曰弟子於師邱山厚德無以爲報其僕其御實當爲之事予惟不知所求亦不知爲勞也同行者由是雖勤苦百至皆爭赴矣辛巳西至阿不罕山始有漢人耕作因公等九人立棲霞觀癸未住德

道藏輯要

甘水仙源錄

十

翼集三
又文川

興之龍陽甲申長春奉旨往燕城太極宮尋更名長春公亦自龍陽來丁亥師反真公年四十一矣一日靜坐一室忽於恍惚間見重陽長真長春三師真公拜畢侍立祖師言汝壽當七十五長春言汝五十後必負教門重任事雖繁劇汝勿憚是皆磨礪汝之砥石煅鍊汝之爐冶也言訖不知所在尋覺身中百關通暢真氣汭流昇尾閭入泥丸是後日復一日神物變化金漿玉液黃庭絳宮灌溉浸漬非言可及公因徧考先代師真得道之後身中之事著見於書者針芥相投矣公從此以來雖顛沛造次罔不在是其身中所得流運之理亦未嘗止想當時其爲樂可勝計耶至清和真人掌教乃副知長春宮事俄遷知宮戊

戊戌受宮門提舉丙午遷宮門提點戊申權教門事己酉以恩例
賜金冠紫服并至德玄虛悟真大師號癸丑掌教真常大宗師
奉朝命普度戒錄委公爲監度師丙辰真常羽化誠明真人張
公嗣教以公玄門大老之故已又在制遂授以教門都提點印
俾攝其事戊午秋應丞相胡公之請主平陽黃籙羅天大醮尋
奉令旨賜今真人號中統二年辛酉春秋七十有五矣度門人
五百有奇宮觀稱是是年春二月二日順正而化前此數日預
以後事囑門人凡來省視者見其耳聰目明音吐洪暢盡如平
昔皆不之信至是方知公之所得過人遠甚越三日葬之五華
山仙塋從遺命也至於度門人立宮觀茲皆緒餘土苴眾人之

道藏輯要

甘水仙源錄

七

翼集三

卷三十一

所共見者或可得而言之今壽幾八十矣而精神不衰臨行一
著又明白如彼其素養之於內必有精真微妙眾人之所不能
見之者豈易得而言之也送葬之日官僚士庶前擠後擁傾動
都邑道眾不言可知秋九月門人狀其行請文於予予因按其
實而次第之屬以銘曰

荏苒柔木言縉之絲大浸滔天砥柱不移二者之美公并有之
公既有之我請布之一遇師真便得正理觀公之性已超異矣
及住大宮中正不倚四十年間又出類矣苟非其人道不虛行
本若不立道無由生推公之孝及公之誠本旣立矣道宜有成
人所見者緒餘土苴公之得者妙絕真假天地一指萬物一馬

不以是觀知公蓋竄與其觀身孰若觀神神如之何把握乾坤
陰升陽降黃河崑崙至人妙處不屬見聞精神骸骨各歸本始
門人治任奢儉合禮燕城之北五華之址碑以表之公元不死
渾源縣真常子劉君道行記

前進士王鶚撰

君諱道宣雲中白登人世爲縣吏以廉平稱君生不好弄聞與
諸兒戲必結庵趺坐曰我學道爾識者知其有宿習及長雅意
玄門昆季凡四人君其伯也縣民推嗣世業力卻之太和壬戌
聞渾源隱士劉柴頭號得道乃與家人訣詣屏風山金泉觀師
事焉師歷試諸難至遣丐食君樂從不屑也師知可教遂授微

道藏輯要

甘水仙源錄

三

翼集三

旨白是東遊海上西歷關中寓華山上方之白雲宮屬歲饑僵
餒立志不少衰旣又如太原泊神霄宮有饒益院僧賢而飯之
道獲楮幣千二百貫君榜求其主踰月竟不至悉以給貧乏而
一無所私貞祐之甲戌避地張村穴洞以居歲丙子鄉里稍安
帖土官馮祿聞君之在井也迎歸雲內君尸居環堵若將與世
絕者而樂道之人渴於請益百方爲出之於是肩摩踵接學君
之學者日益眾矣庚辰春渾源長高定飽聞君譽敬請之來曰
龍泉曰金泉曰玄元皆名觀也君更爲住持而興廢起頓之功
爲多癸未秋真人邱長春入觀回君執弟子禮迓諸銀海之東
目擊道存一見如故問君之初事以柴頭對師頷之曰仙人中